



KOMUNIKADO PA PRENSA

Fecha

19 di ougùstùs 2019

Persona di kontakto

Jason Obispo

Email

programarif@gobiernu.cw

E Rif nobo ta limpi, salú i vibrante

Willemstad – Ehekushon di Programa di Desaroyo di Rif, kual ta konsistí di un kantidat di 8 proyekto tantu públiko komo privá, a kuminsá ofisialmente. Preparashonnan ménos bisto a kuminsá for di komienso di e aña aki, i resientemente públiko por a nota komienso di e trabounan bisto tambe. Meta di Programa Rif ta pa hasi di Rif un área vibrante pa habitantenan di Kòrsou i turista. E programa ta konsistí di 3 fase. Den e fase aktual - esta fase 1 - lo inisiá i finalisá 5 proyekto públiko grandi den e área aki, i tambe 3 proyekto di inisiativa privá.

Komo parti di e Strategia di Kresementu pa Kòrsou (“Groeistrategie Curaçao”), Ministerio di Tráfiko, Transporte i Planifikashon Urbano a duna prioridat na Programa Rif. E proyektonan ku ta forma parti di e programa aki ta: un infrastruktura - adaptá na e nesesidat di futuro - pa maneho i transporte di awa di riolering, un kaya nobo pa konektá sentro di Otrobanda ku e terminalnan di krusero pa medio di ekstenshon di Hamelbergweg, Parke di Palu di Mangel 1, un kanal di konekshon entre Parke di Palu di Mangel 1 i 2 i un kaya nobo pa mehorá fluktuashon fásil i lihé di tráfiko ku ta bini di e terminalnan di krusero, via stadion di Rif. Gobièrnu mes lo finansiá e proyektonan aki, pa un montante total di entre 20 pa 25 mion florin. E proyektonan di inisiativa privá ta Hotèl Corendon i Hotèl Courtyard Marriott, i renobashon di Hotel Renaissance Curaçao Resort & Casino.

Desaroyo di e área di Rif tin su base den un kantidat di dokumento stratégiko durante añanan. Entre e dokumentonan aki ta figurá Plan Mayó (2007), Masterplan Rif di Konseho Insular, vishon stratégiko Zakitó, mas resien den Programa di Gobernashon 2017-2021 i por último Strategia di Kresementu pa Kòrsou. Pues, for di un punto di bista di maneho no tin duda ku e área di Rif meresé atenshon i ta hañando esaki. Sinembargo, ta importante pa desaroyá Rif ku urgensia. No solamente for di punto di bista di maneho, pero tambe teniendo na kuenta aspektonan di salubridat públiko i di infrastruktura.

T’asina ku e área di palunan di mangel na Rif ta kontaminá i na sierto partinan asta gravemente infektá ku supstansianan dañino pa salú. Esaki, debí na e desagwe di awa di riolering den e “binnenwater” di Rif, kombiná ku e echo ku e awa den e área



KOMUNIKADO PA PRENSA

Fecha

19 di ougùstùs 2019

Persona di kontakto

Jason Obispo

Email

programarif@gobiernu.cw

aki no ta sirkulá. E falta di sirkulashon di awa a krea ademas un área grandi di lugá di brui di sangura. Konsiderando ku den un lapso di algun luna pa dos aña Curaçao Medical Center, Hotèl Corendon i Hotèl Courtyard Marriott lo habri nan portanan, e situashon di desagwe den e “binnenwater” di Rif lo empeorá, si no tuma akshon ku e debito urgensia.

Konseho

Gobièrnu ta konsiente di e preokupashon ku ta reina den sierto gremionan di nos komunidat tokante e palunan di mangel i e kaminda di konekshon entre Rif i sentro di Otrobanda. Ta pa e motibu aki mes gobièrnu a tuma e kantidat di konseho ku tabata nesesario, i a basa su desishon tumá for di aña 2008 i ratifiká na 2018, riba konsiderashonnan di tur grupo di interes, entre nan Sosiedat di Komersiantenan di Otrobanda (SKO) i Amigunan di Tera. Tabatin diferente alternativa pa konektá Otrobanda i Rif. Ku e opshon ku a opta p’e, lo ‘verdun’ algun palu di mangel. E área kaminda lo kita algun palu di mangel ta netamente un área kaminda e suela ta sumamente infektá, loke ta forma un menasa pa salubridat públiko. Lo krea un parke di palu di mangel ku un ruta pa peaton, un ruta pa bai den kanoa i posibilitat pa rekrea. Ademas lo tin un sentro di informashon pa bishitante, kaminda muchanan di skol tambe lo por haña tur informashon pa traha nan proyektonan eskolar.

Un di e kondishonnan mas importante pa por krea e parke aki tabata un solushon pa e problema di desagwe di awa di riolering den e “binnenwater” di Rif, kaminda e palunan di mangel ta. Lo atendé e problema aki dor di instalá un pòmp nobo ku generator, i komputarisá, pa e sistema ku ta atendé maneho di awa di riolering. Banda di esaki, un sistema di pipa di preshon haltu lo sòru pa transporte di awa di riolering for di e punto kaminda ta kolektá e awa sushi aki, te na Klein Hofje. E sistema aki lo kumpli ku e nesesidatnan di futuro. Ku otro palabra, e preshon riba e sistema aktual lo baha i ku esaki lo minimalisá e desagwe. Tambe gobièrnu lo krea un posibilitat pa awa fresku di laman dreña e “binnenwater” di Rif i dor di konektá e dos áreanan di palu di mangel na otro pa medio di un kanal di konekshon, lo hasi posibel pa awa sirkulá i asina eliminá e problema di sangura tambe.

Gobièrnu ta konsiente di e molèster temporal ku e trabounan relashoná ku Programa Rif por okashoná pa habitantenan i bishitantenan di e área i ta diskulpá di



KOMUNIKADO PA PRENSA

Fecha

19 di ougùstùs 2019

Persona di kontakto

Jason Obispo

Email

programarif@gobiernu.cw

antemano. Gobièrnu ta mustra alabes riba e importansia pa ehekutá e proyektonan aki ku e urgensia nesesario, na benefisio di komunidad di Kòrsou i futuro generashonnan.

Pa informashon general, entre otro e situashon di tráfiko adaptá den e área di Rif, por tuma kontakto ku Ministerio di Tráfiko, Transporte i Planifikashon Urbano via WhatsApp 5999 511-8582 i Facebook (MinisterieVVRP).

- FIN DI KOMUNIKADO -

Athunto:

Foto

Persona di Kontakto pa Prensa

Jason Obispo

Bosero di Programa di Desaroyo Rif

+5999 528-9482

programarif@gobiernu.cw